

UMP dan RTM Pahang Bertemu komuniti Sungai Koyan dalam program Kembara



Raub, 29 Mac- Seramai 60 dalam kalangan mahasiswa Majlis Perwakilan Pelajar (MPP) dan warga kerja Universiti Malaysia Pahang (UMP) daripada Pejabat Naib Canselor dan Jabatan Hal Ehwal Pelajar dan Alumni serta kakitangan Radio Televisyen Malaysia (RTM) Pahang bertemu komuniti Felda Sungai Koyan 1, 2 dan 3 bagi menjayakan Program Kembara Pahang FM bersama UMP yang berlangsung selama tiga hari baru-baru ini.

Program kerjasama ini bertujuan mendekati masyarakat melibatkan warga UMP bersama kakitangan RTM Pahang dan penganjuran pada kali ini mendapat kerjasama daripada pihak Bank Simpanan Nasional (BSN) dengan menjayakan pelbagai aktiviti sepanjang berkampung di sana.

Antara yang diadakan ceramah agama ceramah agama yang disampaikan Ustaz Mahmud Mat bertajuk `Cermin Diri'. Turut diadakan sukaneka, pertandingan mewarna kanak-kanak, pertandingan memasak, kem motivasi pelajar, melukis mural dan persembahan kebudayaan.



Majlis perasmian program disempurnakan oleh Ahli Dewan Undangan (ADUN) Jelai, Dato' Sri Wan Rosdy Wan Ismail yang hadir dalam Malam Kebudayaan sempena Program Kembara Pahang FM bersama UMP yang diadakan di padang Sg. Koyan 3. Majlis dihadiri Pengarah RTM Pahang, Zubad Ibrahim, Pemangku Pendaftar, Abd. Rahman hj. Safie dan Ketua Bahagian Rancangan, Noor Asmihan Mansur.

Menurut Dato' Sri Wan Rosdy, pihaknya berbesar hati menerima kunjungan mahasiswa universiti dan warga kerja UMP dan RTM yang sanggup datang jauh ke Sungai Koyan. Beliau mengharapkan kunjungan ini tidak berakhir setakat ini sahaja malahan akan diteruskan dengan lain-lain program selepas ini untuk dimanfaatkan bersama masyarakat di sini.

Sementara itu, Abd. Rahman dalam ucapannya berkata, pelaksanaan program ini adalah manifestasi komitmen UMP untuk memasyarakatkan kewujudannya sebagai sebuah Universiti Awam (UA) agar kewujudannya dirasai, kehadirannya dapat dilihat dan suaranya didengari masyarakat.



"Program yang masuk kali kelapan ini juga menasarkankan empat segmen komuniti utama iaitu kanak-kanak, remaja, masyarakat, dan pendidikan. Program kali ini juga mendukung tiga objektif utama iaitu memasyarakatkan kampus dengan menjalankan pelbagai aktiviti yang memberi nilai tambah kepada komuniti, menyuburkan hubungan yang harmoni antara UMP dengan media dan masyarakat melalui perkongsian pintar dengan mempromosikan jenama UMP sebagai sebuah Universiti Teknologi Pilihan Utama," katanya.

Bersempena dengan program ini, mahasiswa UMP berpeluang mengadakan kem motivasi kepada seramai 80 pelajar SMK Koyan yang bakal menduduki peperiksaan Sijil Pelajaran Malaysia (SPM). Di antara aktiviti yang diadakan adalah parachute egg experiment, launcher bola ping pong, ice breaking dan refreshment.

Bagi pengarah projek, Timbalan Yang Di-Pertua MPP Gambang, Muhammad Adib Abid berkata program ini mendapat respons dan komitmen yang baik daripada pelajar sekolah. Kebanyakan aktiviti adalah berunsurkan sains dan kejuruteraan sebagai contoh aktiviti parachute egg bertujuan melihat kepada kekuatan, masa dan struktur parachute yang dibina peserta.

Begitu juga dengan launcher bola ping pong membolehkan pelajar mengaitkan kadar pantulan bola dalam subjek Fizik yang dipelajari di sekolah. Selain itu, katanya ianya dapat mempromosikan UMP dalam kalangan pelajar sekolah untuk menjadikan universiti ini sebagai destinasi pengajian mereka nanti.

Masyarakat di sini juga dihiburkan dengan persembahan kebudayaan yang menampilkan dua artis terkenal, Nasser Wahab dan Syura diiringi Kombo RTM Pahang serta tarian kebudayaan UMP daripada Kumpulan Kencana Pawana.



Disediakan Unit Perhubungan Awam, Bahagian Komunikasi Korporat PNC

Posted By : SITI SARAH BINTI MOHAMAD RAJIMI Date Posted : 30-03-2015, 17:13:54